

77 Guillaume

1614

(87)

30.34


LA
NOUVELLE
LVNE DE MAISTRE
G V I L L A V M E.

*Sur l'heureux retour de Messieurs
les Princes.*

M. DC. XIV.

14 pp.
27.1

ACC 83-101(87)



LA NOUVELLE

LVNE DE MAISTRE

Guillaume.

*Sur l'heureux retour de Messesseurs
les Princes.*



E la voy, ie la voy, Madame la
Lune nouvelle : Dieu la gard
des escreuisses & de la manche
de Mahomet. Et quand ie ne la
verroy point, ie la recognoistrois a la dis-
position de ma teste, cōme faisoit feu mon
pere, a qui Dieu donne bonne vie & lon-
gue, le changement du temps a vn cor
qu'il auoit entre deux orreils. Car ie sens
ma ceruelle qui s'enfle soubs mon capu-
chon, comme la paste dans la mets. C'est
signe que i'en ay, oüy. Si vous ne le voulés
croire, faitez comme S. Thomas, mettez
la main dessus. He! ne le sentez vous pas?
dites la verité. Hai, hai, de par le diable, cō-
me vous y allés, frere, vous m'auez telle-

ment ferré la pie mere, que si elle eust eu des œufs dans le ventricule, comme elle en auoit a Pasques, vous l'eussiez fait auorter. Et ie ne scay lors ce qui en eust esté. Ie vous prie, n'y reuenez plus. Cela ne me plaist point, ie le dis du meilleur sens que i'aye. Arrestés vous, vous dis-ie, pourquoy me pincés vous les costez? ie n'ay pas enuie de rire. Laquais ma foy si tu ne me laisses en patience, i'appelleray ton maistre, ie le cognois bien, affin que tu ne sois point trompé. C'est ce gentilhomme vestu de iaune, qui reuint hier au soir en poste de sainte Menehoud. N'est ce pas luy? A propos, dy moy vn peu quelles nouuelles raconte il de ce pays la? y a-on chanté le Te-Deum en musique sans faux bourdon sur les orgues de la sainte Chapelle? y a-on fait iouer le canon? y a-on fait les fuseés de l'annee passée sur l'eau? Y a-on beu à la santé du Roy & de Madame l'Infante sa promise? y est-on cōtent? y rit-on? y danse on? Est il vray que Monsieur de Longueuille est desia reuenu, & Monsieur du Mayne aussi? Car ie n'ay point forty tous ces iours passés de la chambre, a cause d'vne opilation de rate qui ma donné la migraine venteuse aux hypochondres: ie m'en sens

encore vn peu. Tu ne respond pas, dy donc, ou sont les autres? Quand reuiendront ils? Par quelles portes entreront ils? Quelles mines tiendront ils? Quels cheuaux monteront ils? Tient on pour certain qu'ils ne cheuaucheront iamais genets d'espagne, s'ils ne chient des doublós sous la queue côme l'asne de Zampin des tournois. Tu ne dis mot. Si le dois tu scauoir, car tu viens des lieux. Parle donc? Quelle entree leur ferat'on? Comment les receurat'on? Quel discours leur tiendra t'on? Les cinq Geans du Carrouzel iront ils pas au deuant avec le bon saint Christophle de nostre Dame, leur confrere? Lequel des six portera la parole? Ie pense que ce drolle est sourd ou muet, ou possible l'vn & l'autre tout ensemble. Car il ne branle ny ne brait, non plus que le Ieufneur. Ha, ha, ha! par ma foy, ie suis plaisant: ie prenois l'ombre des calçons estendus sur ceste corde pour le garçon de ce Capitaine iaune, dont ie parlois. Celle la est bonne. Si faut il que ie m'informe sur tout cela de quelcū qui le puisse scauoir: car ie me veux preparer pour leur aller au deuant, & leur faire vne petite harenque en genre recrea-

tif, qui est vne nouvelle drogue de Retho-
 rique incognüe iusqu'a cest heure. Je les
 feray rire si ie puis, comme ie faisois quel-
 que fois feu monsieur mon maistre, quand
 il en auoit enuie. Je say qu'ils prendront
 tout en bõne part de moy, cõme ilz firent
 ces iours passez, la lettre que ie leur escri-
 uis pour les exhorter à reuenir promte-
 ment. C'estoit vne aussi bonne piece à
 mon iugemēt qu'autre qui s'en soit faiçte
 sur ces derniers bruits, encor' que beau-
 coup d'habiles gens y ayent mis la main. Je
 ne sçay si ie me souuiendrois du contenu,
 car ie n'en ay ny minute ny copie. Je leur
 mandois que, non faisois, si faisois, pardon-
 nez moy, cela y estoit. Et à quel propos
 leur aller parler sur ce subiect de la nouuel
 le inuention de fondre les cloches, appor-
 tee depuis peu de la Chine par le Nord.
 Il n'y auoit point d'apparence. Si auoit,
 pour monstrier que, quoy? que les che-
 uaux qui ont le poil blanc ont le cul noir.
 C'est bien rentré de piques noires. Vn peu
 de patience. Mon gouuerneur qui a la clef
 de ma memoire viendra à cest heure, nous
 l'ouurirõs pour voir ce qui en est. Je pense
 qu'il m'est allé querir vn melanoguogue
 chez vn apothicaire, pour me purger vn

peu de ces humeurs noires qui me barbou-
 illēt parfois l'armet. Quand i'en ay pris vne
 petite dose au matin, ie fay merueille l'ap-
 presdisnee. Il n'y a Philosophe dās Nauare
 ou Boncourt que ie ne mettē au rouet.
 I'en pensay faire endeuē vn ces iours pas-
 sez. Nous disputions du chemin de S. Iac-
 ques, il m'aloit chercher ie ne sçay quel lait
 de Iunon, embrasement de Phaëton, avec
 des coustures du Ciel, & autres choses sē-
 blables. Le luy montray que i'en sçauois
 plus que luy, comme y ayant esté. Il ne le
 croyoit pas si ie ne luy en eusse mōstré mes
 bulles & attestations. Mais dit il, si tu y as
 esté rends moy raison pourquoy on n'y
 void iamais de foudres n'y de comettes.
 Vous voila bien empeché, luy respondis je,
 c'est pour ce qu'il ne s'y en engēdre point.
 Il se prit lors à rire, & ô le diuin homme
 s'escrie il, qui rend de si promptes & si cer-
 taines raisons de ce qu'on luy demande,
 qu'il oste avec toute occasion de doubter
 tout subiect de repliquer. Mais de qui as-
 tu appris cela, Maistre Guillaume? d'un
 cousin de l'Abbé Ioachim Monsieur, qui
 s'apelloit Panepistemon & enseignoit
 l'Encyclopedie, dans trois heures pour
 dixhuiēt solz sur le pont aux oiseaux, à

main gauche, quād on va & à main droicte quād on vient. Ho vrayment que i'en ſçay bien d'autres. I'estois l'autre iour allé derriere les Chartreux voir ſi les febues eſtoient en fleur, affin d'en cueillir & en faire vne opiate à ma teſte. I'y trouuay Pythagore ſoubz la figure d'vn lieure en forme, blotty entre deux mottes de terre, qui en gardoit deux arpās en carré hexagone. C'a eſté à ce qu'autres-fois i'ay ouy dire à mon premier maiſtre, qui eſtoit Enlumineur, vn fort ſçauant homme & qui faiſoit tout par nombres iuſqu'aux ſemeles de ſes ſouliers. Mais ie luy fis entendre des choſes auſquelles il n'auoit encore iamais ſongé. Ie luy montray que l'opinion des anciens touchāt les Elements, eſtoit fauſſe & erronee. Car ils n'en eſtabliſſoient que quatre, & il y en a cinq. Et qui eſt le cinquieſme dit-il? l'argent. D'abort il ne le pouuoit comprendre, mais à la ſeconde demonſtration que ie luy en fis, il acquieſça & l'approuua de la queüe. Ah ie ne m'eſtonne plus dit il, ſ'il a tant de force & de vertu, & ſi on ne ſ'en peut paſſer. Ie voulus gager apres cela contre luy que ie luy ferois voir le vuide en la nature. Et ou dit-il? dans les trente barils qu'on tira dernièrement

niement de la Bastille. Il dit ie l'entens.
 Mais tout cela n'est rien au pris de ce que
 ie luy enseignay touchant la combination
 des metaux, la sympathie des espinettes
 avec les clochers, la transmutation des
 Idees Vtopiques, la superficie de l'espace
 imaginaire, la multiplication des mondes
 d'Epicure par ceux de Doni, la dimension
 Geometrique des atomes de Democrite,
 la clarification des estoilles nebuleuses,
 la confederation du Pole Arctique avec
 l'eguille marine, & ce qu'il estima le plus
 la reformation du clocher de S. Ger-
 main de l'Auxerrois sur le modelle de la
 Citadelle de Mezieres. Il me iura par sa cuif-
 se d'or enterree dons la lice des ieus Olim-
 piques, qu'il n'eust iamais creu que l'Ori-
 zon de Paris eust couuert tant de sagesse
 & de doctrine sous vn bonnet à deux oreil-
 les. Maistre Guillaume mon amy, mon
 grand amy, qui t'a appris tout cela? Vous le
 sçauriez luy dis- ie, si ie vous l'auois dit. Il
 admira cette responce & la mit dans ses ta-
 blettes entres les apostemes de Gaulard.
 Ce n'est pas peu d'estre loué d'un si grand
 & si celebre personnage.

I'oublois, mais ie pense l'auoir desia
 dit. Non ay, si ay, Qui est celuy là qui me

dement? Il a menty luy mesme. Ah par le cul d'un haneton de Ianuier, ie t'en feray repentir Cagot & Magot que tues. Les duels sont permis à cest-heure. Ie t'en-uooyeray demain au matin vn cartel en guise de poulet, par vn page vestu en damoiselle. Ne fais pas semblât de rien : ou bien si tu t'ennuyes de viure, allons tout maintenant nous battre à la place Royale aux flâ-beaux, à la charge que tu les payeras, da, & aussi ils pourront seruir à ton enterremēt. Oh, c'est la raison. Pourquoi : parce que, attendez ie vous le diray à cette heure, mais non, qui en voulez vous croire? Il faut donc plaider. Voulez vous que ce soit deuant Angouleuent. Dame, il prendra bien les espices. Il entend cela. Il est cousin cent neufiesme de Pytagore. A propos ie n'ay pas acheué les discours que nous eusmes ensemble, il me raconta toutes ses aduentures & ses dix-neuf mille trois cens soixante sept sortes de vies qu'il à vescu depuis le commencement du monde. Car il à esté arbre, oyseau, poisson, beste à quatre pieds, femme & homme à plusieurs & diuerses fois. Il n'y à mestier qu'il n'ayt exercé en vn pays ou en l'autre, hormis qu'il n'a voulu iamais estre à ce

qu'il dict Roy en Escosse, Duc en Angle-
 terre, ny financier en France. Il m'en dict
 les raisons. Je pris plaisir à ouyr ce qu'il
 me dict touchant l'enuie qu'il print vne
 fois d'estre Royaume. Il le fut. Mais il
 dict qu'il ne trouua iamais rien de si bon
 pour lors que la paix, laquelle il me loüa
 merueilleusement. Surquoy il prit sub-
 iect de me discourir de la prudence de
 la Reyne ma bonne maistresse, de l'auoir
 si sagement maintenue & conseruee ius-
 qu'à cet heure à ses subiects : Au demeu-
 rant me dit-il, iamais Messieurs les
 Princes ne firent mieux, Il me dit pour-
 quoy. Je trouuay qu'il disoit fort bien. Ils
 le recognoistront par experience. Il me
 chargea de les aduertir en general des be-
 nedictions qu'ils attireroient sur eux s'ils
 continuoient comme ilz auoient commē-
 cé & en particulier Monsieur le Prince de
 songer à perpetuer & prouigner la souche
 de sa maison, qui estoit le premier soing
 qu'il deuoit auoir, & que possible il ne fe-
 roit pas mal de faire le mesme vœu à No-
 stre dame de Liesse qu'y à fait monsieur
 de Neuers, qui ne s'en est pas mal trouué.
 Il vouloit me donner encor quelque au

tre aduis quand le bruit de certains chaf-
seurs & le clabaudement de la meute le fit
mettre promptement sur pied & gagner
la guarite. Or il faut que ie face vn me-
moire de tout cela pour le mettre dans la
harengue que i'ay deliberté de faire à ces
Messieurs quand ils reuiendront. Mais
quand sera ce? la sepmaine qui vient, me
disoit hier ce page qui me mit trois espin-
gles dans mes fouliez. Il y a du temps as-
sez pour se preparer. I'ay enuie d'en con-
ferer cependant auec quelques vns de mes
comperes, affin de ne rien faire de mal à
propos comme font ceux qui veulēt tout
faire de leur teste. Si en ay ie vne aussi bien
que les autres, & deux chappeaux encores,
l'vn d'Hyuer & l'autre d'Esté. Que diēt on
de sa Majesté? Ho, ie rime sans y penser. Je
suis en verue à ceste heure. Cà vne plume
& de l'ancre, que i'escriue vistement icy
aux rays de la Lune des vers à la louange
de Messeigneurs les Princes.

*Messieurs soyez les bien venus ,
Mercure , le Louure & Venus.*

Et puis, vn peu d'ayde. Ah, qui Diable estce

qui heurte à ceste porte pour me destourner. Cela sera cause que ie ne feray rien plus d'aujourd'huy. T'acheueray demain s'il fait beau, c'est à dire si le temps est carminiforme, comme dit Iules Cesar. Dame, c'estoit vn braue hōme celuy la, & si vaillant que ceux qui le tuerent, si luy eussent donné le loisir de se confesser il eust esté canonisé. Mais n'est-ce pas vne trompette que i'entēs? Possible ce sont ces Messieurs qui arriuēt. I'ay bien peur que Mathurine ne me tiendra pas ce qu'elle m'a promis, qui est de m'aduertir de leur venue. Car elle voudra me preuenir, & gagner le deuant. Sçauiez vous ce qu'il faut que ie face? que ie prenne vne chambre garnie sur vne des tours de nostre Dame pour les voir venir de loing avec vne de ces lunettes de Hollande que l'on vend au Palais. En estes vous d'aduis? & vous? & vous? Ne suis par ma foy pas moy.

Car si le sainct Christophle qui leur sert de fondement sortit de l'Eglise pour leur aller au rencontre avec les autres, ainsi qu'on m'asseure qu'il fera, elles tomberoient, & Maistre Guillaume s'y trouuant enueloppé, s'y pourroit disloquer quelque doigt. Il vaut mieux tenir

des gens en sentinelle sur les aduenues,
 pour m'en venir donner promptement
 auis quand il sera temps. Ouy, mais il
 leur faudroit de l'argent. S'il ne tient qu'à
 cela, ie n'en ay point. Messieurs si quelcun
 de vous en à, Oh, la Lune se cache,
 c'est possible qu'elle prend son mas-
 que pour aller à la ville, ie m'en
 vay luy faire compagnie.

F I N.

